

Gnade sei mit uns und Friede von Gott unserm Vater und unserm Herrn Jesus Christus! Amen

Liebe Festgemeinde und insbesondere: Liewe Steejer Isel!

Wie die Anna-Kerch geweiht wor is, do hot hie die reinscht babylonisch Sprach-Verwirrung geherrscht: Viele Bauleit kame domols aus Italien – Rom hat jo sowieso es letzschde Word! Un die Bauleitung war wahrscheinlich in Köln; denn das Sankt Andreas-Stift do hat hie die Pfarr-Reechde.

Die Leit im Dorf hadde schwer ze Schaffe, awwer se hadde aach Hilf: die Isel!!! Die Vierboiner ware hie werklich lang in de Gäng. Gedullich, stark, stur, treu, koi große Anspruch – vun allem ebbes kinnt bei de „Gattung Isel“ im Steckbrief stehn. Se hon schwer Arwet geleischt, besonnensch uff de domols schmale Wingerspädcher. Die Iselszeit is lang vorbei, awwer de Isel is us als „Spitzname“ erhall geblieb. Mer kann sahn: **Das is us Markezeiche!** Us Logo.

Heit soll awwer von Isel in de Biwel die Red sein, die als „Könichs-Macher“ gewirkt hon! Wer sich heitzudaach in de groß Politik en Name mache will, dä braucht beim Uffsteije uffs Hohe Ross Hilf: de sogenannte Steigbügelhalter, der braucht die Zeidunge als Moinungsmacher, Geld un vieles meh! Er braucht en Lobby. --.--

Beim Saul, dem Sohn vum Kisch (de hot 600 Jahr vor dem Herr Jesus gelebt), do war das ganz annershd: Dem Saul sei Vadder hat uff em Maad **Eselinne** kaaft, paar uff oinmol! Er muss zimlich viel Äcker gehat hon. Un wie das so ging uffem Maad: De Kisch hot mo widder die halb Gesippschaft getroff, se sein ins nächschde Wertshaus, hon oine getrunk, verziehd un die Zeit vergess. Wer woiß, wann mer sich widder mo sieht ..

Wie de Kisch no em letzschde Becher Wein sei Zech bezahlt hat un jetzt awwer los wollt, do ware die Eselinne verschwunn. Spurlos. Was jetzt? **Saul, de Sohn vum Kisch**, hat die jüngschde Boin, er war groß un scheen, sät die Biwel. Dä muscht sich met nem Kneecht uff die Such mache. Wie en Fahndung, so is das abgelaaf. En Handvoll Stammes-Gebiete, das vun Ephraim, vun Schalischa, Schaalim, vun Benjamin und bis hien zum Gebiet von Zuf hon se dorchsucht, Saul und de Kneecht. Nix. Die Eselinne ware wie vum Erdborm verschluckt. Un do in Zuf, do hat de junge Saul awwer die Nas voll un hot dem Kneecht gesaht: Mer drehe um, sunscht muss de Vadder am Enn noch no uus zwo suche losse.

Awwer dä Kneecht, dä hat nit nor iwverall die Aawe uffgemach, sondern aach

die Ohre! Und dä hot dem Saul gesaht: Nor mo langsam! In de Stadt is heit en „*Seher*“, der hoischt Samuel. Gud un scheen, seht de Saul, awwer mer kenne doch nit den Gottesmann no dene Iselcher frohe und dann oinfach danke sahn und fortgehn – ich hon koine Penning bei mer! Dä Kneecht awwer, der hat doch tatsächlich en Verdel-Silwerdaler im Säckel und hot en dem Saul angebot! Un wie bestellt, kam do en Mädche des Wächs, das kunnte se no dem Seher frohe. Und das Mädche hot Beschoid ge-wuscht: Dä Seher Samuel werd heit uff de Höh en Opferfescht met us feiere. Geht am beschde schun mo in die Stadt nen un dann als de Herd no.

Großardich. Jetzt hadde die Iselsucher die richdich Fährt! Un es is noch besser wor: Grad wie sie in die Stadt nengehn wollte, kam dä Seher Samuel eraus. ***Das war koine Zufall, do war Gott am Werk!*** Gott iwwerläscht nix däm Zufall. Die Biwel schreibt: Gott hatte Samuel das Ohr aufgetan, einen Tag, bevor Saul kam! Und Samuel hörte: ***Morgen um diese Zeit werde ich einen Mann aus dem Stamm Benjamin zu dir senden. Den sollst Du zum Fürsten über mein Volk Israel salben, der soll sie aus der Hand der Philister befreien.*** Die Philischder ware de Erz-Feind!

Große Sache sein im Stadtdor abgehannelt wor: Do is Reeht gesproch wor, Mensch un Vieh hon de Besitzer gewechselt un so weider. Oiner hot de anner iwwerbot. Un bei däm „Geräuschpegel“ hot dä Seher Samuel die Stimm Gottes geheert: ***Hier kommt der Mann, der über mein Volk herrschen soll.*** Der Mann war de Saul, kam direkt uff den Seher zu und hot gefroht: Kannscht du mer das Haus vum Seher zeije?

Dä Samuel hot geantwort: Ich sein de Seher. Mach der koi Gedanke, dei Eseline sein gefunn wor, komm met in mei Haus. Un dodemet hot de Samuel dän Saul un seine Kneecht met hoim genomm, wo in der Hall schon 30 Mann zum Esse gehockt hon! Awwer Saul un seine Kneecht sein extra gut bedient wor. Saul hot erstaunt geguckt, awwer er is nit unruhich wor. Er hot aach noch im Haus vum Seher die Naacht geschloof wie in Abrahams Schoß. Am nächste Moije ging die Geschicht erscht weider. Do hot de Samuel geruf: Steh uff, Saul, ich will en Stick met der gehn! Am Stadtdor hot de Samuel dän Kneecht voraus geschickt. Jetzt war Gott ganz nah! De Seher hot dem Saul gesaht: Bleib mo stehn und heer, was Gott mer befohl hot! Un domet hat Samuel schon en Salbhorn in de Hänn un hot das Öl dem Saul uff de Kopp gegoss, hot em en Kuss gehn und gesaht: ***Siehe, der Herr hat dich zum Fürsten über sein Erbteil gesalbt.*** Vun dem iwerraschde Saul steht an dä Stell koi Word in de Biwel.

Awwer dä Gottesmann Samuel hot dem Saul jetzt genau gesaht, was forn Wäch er hoimwärts nemme soll; denn do kam en Iwerraschung uff de neie Fürscht vun Israel zu: En Schar Prophete kam em vun de Höh entgähn - das war die

erschrickt Ehr für die neue Königin! Uff manche „Höhe“ kam die Leit sich vor, als wenn se Gott näher wäre! Drum ware uwwer viel Heiligtümer. Awwer de Geischt vun Gott kam aach „unne“ im Daal iwwer den Saul. Er hot sich verändert, säht die Biwel, er ist en annere Mensch wor. Un Saul kriecht noch en Verspreche vun Gott: ***Tue, was dir vor die Hände kommt; denn Gott ist mit dir*** (Kap. 10,7).

Weil awwer alles sei Ordnung hon muss, hot dä Seher Samuel das Volk versammelt, das ehm schon lang weje nem Königin in de Ohre geleh hot. Samuel hot en lang Red gehall. De kurze Sinn war: ***Ihr habt Gott als euren König verworfen – ihr wollt einen König aus euren Reihen eingesetzt haben.***

Un jetzt is gewählt wor: Die zwölf Stämm muschde vor dän Seher Samuel komme, dann is es Los geworf wor. Das Los hot de Stamm Benjamin getroff. Aus em Stamm Benjamin is es Los **uff Saul, de Sohn vum Kisch gefall. Gottes Wahl!**

Awwer wo war dä Saul? Er war unnergetaucht beim Tross, bei bei Fuhrleit! Gott hot es de Sucher selwer gesaht! Se hon de Saul erscht no langer Zeit gefunn – weil er so groß war, hot das met dem Versteche nit so ganz geklappt. So, un jetzt hat Israel aach en weltliche Königin wie die heidnische Nochber-Völker rundum. De neie Königin hat sei Rechte un Pflichte, die das Volk beachte muscht un umgekehrt. Das alles hot dä Seher Samuel in en Buch geschrieb. ***Aach das met de Isel als Königinmacher!!!*** Ja, do kann mer nor sahn: Gott hot viele Handlanger! Un was weggelaafene Isel alles ins Rolle brenge kenne, do driwwer kann mer nor staune!

Halle mer fescht: Artgenosse un Vorfahre vun de vierboiniche Steejer Isel ware schon „***Königin-Macher***“! Un deshalb is dä Spitzname „Steejer Isel“ for uus en Ehren-Bezeichnung! Un das Scheene is, dass Isel bei ehrer Bedeutung nit iwwerheblich were! Se mache koi Wahlverspreche, die se später vergesse, se bleiwe bei ehrem seit Anfang vun de Welt übliche „Iah“ un mache oinfach met Isels-Gedold ehr Arwet, aach wenn se sich ab un zu mo stur stelle.

Un die Moral vun de Geschicht: „Steejer Isel“ is koi bees Word, viel meh en Ehren-Bezeichnung! Gott kann Steejer Isel mit vier und aach met zwo Boin for sei groß Welt gebrauche. Die Biwel git 's uus jo schriftlich! ***Amen***

Und der Friede Gottes, der all seinen Kreaturen gilt,
der bewahre unsre Herzen und Sinne zu allem guten Werk! Amen